

說
庫

第四十五冊

八 絃 荒 史
虞 山 妖 亂 志
天 錄 識 餘

八紘荒史

清 錢塘陸次雲雲臺著

譯史之外。復輯荒史者。何宇宙大矣。以為理所必無。恆為事所或有。故復為廣集群書。以資泛覽。存而不論可也。

善人國

善人國。男朱衣縞帶。女絲服。恭坐而不相犯。交譽而不相毀。人有患力救之。不妄言。嘿嘿然而笑。倉卒見之。其態如癡。

君子國

君子國在東方。其人衣冠帶劍。驅使文虎。鳳凰出其郊。好禮讓不爭。土僅千里。人多疾病。故不蕃息。語云。北方有不釋之冰。南方有不死之草。東方有君子之域。西方有殘形之尸。圖贊曰。東方仁氣國有君子。土多木槿。民人食之。又傳其國有女仙。取玉花鍊成上藥。以相貽贈。

盤古國

盤古國在南海中。今人皆以盤古為姓。

丈夫國

丈夫國在維鳥北其人衣冠帶劍相傳殷帝大戊使王孟從西王母採藥至此絕糧不能進乃食木實衣木衣留止異域終身無妻生二子從背脇中出王孟遂死是為丈夫之祖其地去玉門關二萬里圖贊曰陰有偏化陽無產理丈夫之國王孟是始感靈所通秦石無子

女子國

女子國在巫咸北繞黃池之水以居浴於水即懷姙生皆女子若偶育男三歲輒死又台颺之水女浴之即孕併聞東南海上有女國蓮開丈許桃長二尺女子遇南風感而成孕

東女國

女國在扶桑東千里容貌端正色潔白體有毛髮長委地二三月競入水則姙娠六七月產女胸前無乳項後生臺中有乳汁子百日能行三四年成人矣見人驚避偏畏丈夫食鹹草葉似邪蒿而氣香又有女國乃西羌別種俗以女為玉與茂州鄰有八千餘里城所居名康延州中有弱水南流用牛皮為船有女官外官以男為之王

死於王族中求令女二人立之大為大王小為小玉大王死小玉繼之或姑死婦繼所居皆重屋王至九重其王服青毛裙下領衫其袖委地以文錦為小髻飾足履素鞞重婦人而輕丈夫文字同于天竺以十一月為正每十月令巫者詣山中持咒俄有鳥入巫者之懷剖視之有穀歲必登有霜雪必歉

西女國

西女國其先女主師子國王之妹也兄妹皆為獅子所生其本國之王憎其為獸產也取其兄妹各乘一船泛大海聽其所止而休兄至婆羅門遂有其國妹泛波刺斯西為鬼神所居之地與之交焉乃育群女為西大女國地多珍寶拂憐國王歲遣大夫配焉生男不舉

浮鵠山女國

浮鵠山在海中有女年三百歲有女官道士四五百人年俱百歲學道山中梁武帝時遣使獻紅蓆時帝方捨身其使適至云織蓆之草有紅鳥棲焉故以為名繪圖以獻觀其書蓋鸞鳥也

狗女國 此即狗國以其無男故入女國

狗女國初未聞其名。梁天監六年。晉安人渡海。飄至一島。登岸皆女人。貌近中華。言語不可曉。其男人身狗頭。聲如犬吠。食有小豆。衣布築土牆形。圓戶如竇。

蛇女國

蛇女國在西北海中。以蛇為夫。穴處而不噬人。尊一女為君。下為臣民。居宮室無書契。信咒咀。直者無他。曲者立死。

猿女國

猿女國在昆明絕徼之外。女子以猿為夫。生男是猿。入山谷晝伏夜游。生女長與之配。亦巢居穴處。

鬼女國

鬼女國在南海東南。以鬼為夫。鬼致禽獸飲食養之。女惟安享而已。

天女國

天女國在北海之東。昔聞天女下降。為其國主。國中有男女如恆俗。又聞板楯之西有女國。女悍男恭。女為君。男為妾。媵多者百計。

女蠻國

女蠻國在南海大中。初貢雙龍犀。其人危髻高冠。纓絡被體。謂之菩薩蠻。唐樂部遂製此曲。

大人國

大人國在朝鮮之東。其人孕三十六年而生。其兒長大能乘雲而不能走。按周穆王曾升巨人之臺。意即此乎。又聞有大人者。在西北海外。長二千里。兩足相間。去千里。腹圍一千六百里。不食諸食。惟日飲天酒五斗。名曰無路之人。大荒經又載大荒之中有樸父焉。夫婦竝高千里。自輔天初立時。使其夫婦導開百川。懶不用意。謫之竝立相對東南。各露其竅。須河清時。方復其役。河圖玉版云。龍伯國人長三十丈。壽萬八千歲。佻人國長亦如之。洞冥記支提國人長三丈。輶雅云。西南荒有大人。名曰先通。異物志丁零之北有大人焉。偃卧於野。其高如山。頰脚成谷。橫身塞川。其大不可以理道計。

長人國

長人國在新羅之東。人長三丈。鋸牙駒爪。黑毛覆身。不火食。啞禽獸。或搏人以食。得婦人以治衣服。其國連山數千里。有峽固以鐵闔。號鐵關門。新羅常屯弩士數千。固

守其地。成化時。蘇衛軍士赴崇明。泛海飄至一島。山麓曠異。一人從林中出。長三四丈。深目黑面。獐醜不可喻。挾此數人。以藤貫掌心。繫於樹下而去。眾極力斷之。竄返舟中。其人偕數大人。追至立水滸。以手攀舷。一勇士掣利刀截斷其指。大人負痛捨舟而去。其指長尺有四寸。辯之乃一指中一節耳。今猶藏嘉定庫中。

長臂國

長臂國在海東。身如中人。而臂長二丈。又有長股國。與長臂相連。腳長三丈。負長臂人入海捕魚。曰留國之邦。又曰喬國。今伎藝家以雙木續足。名曰躑躅。其戲像此。

小人國

小人國一曰周鏡。長三尺而冠帶。一曰焦僥。人長一尺五寸。唐虞時入貢。沒羽。故馬融有納焦僥之珍羽之句。漢時亦屢入貢。傳云黃帝時務光長七寸。豈其類歟。又漢時東都獻短人。長五寸。名曰巨靈。又東北之極有淨人。長九寸。

西北荒小人國

西北方有小人。長一寸。其君朱衣元冠。乘輅車。威儀甚都。人有過之者。抓食之。其味辛。終年不為物所咋。并識萬物名字。又殺腹中三蟲。三蟲死便可上仙。

遺池小人國

遺池國陀移國人皆長三尺壽萬歲

歐羅巴西小人國

歐羅巴西有小人國高不滿二尺跨鹿而行大秦國南有小人國其人亦爾

羊胞頭小人國

小人生突厥之北長僅二尺頭少毛髮突厥呼之為羊胞頭恆持弓矢與鳥相戰康居國西北亦有小人甚眾其地出夜光明月之珠魏時河間王子充家雨中有小兒八九枚墮於庭長五六寸自云家在海東南因風飄至此與之言甚有所知皆如史傳所述嘉靖時衛人胡秀攜一小人長可一尺眉目鬚髮種種皆備乃男子也約年五十餘歲云至東海大洋風浪中得此同輩男女一十七人眾商各分其一但聞作啾啾聲不知所言何事見人亦不驚懼能周旋倦則喘息西陽雜俎載李章武有人腊三寸餘眉目分明言得之樵僦國

鶴民小人國

鶴民國在西北海人長三寸日行千里步疾如飛每為海鶴所吞其人性能機巧常

刻玉為已狀。或數百聚於荒野水際。鶴以為小人也。吞之而死。後見真者。遂不敢食。多在山澗溪岸之傍。穿穴為國。或三十步五十步為一國。如此不啻千萬。春夏食露草。秋冬食草根。暑則裸形。寒則編細草為衣。亦解服氣。海之外。又有鵠國。男女皆長七寸。為人自然有禮。壽三百歲。日行千里。百物不敢犯之。惟畏鴻鵠。吞之。人在鵠腹中不死。而鵠一舉千里。亦與其人同壽。

菌人國

菌人國其人絕小。朝生夕斃。有似芝菌。又銀山有樹上生嬰兒。日出能行。日沒而沒。嶺海異聞注。香山有物如嬰孩。魚貫同行。見人輒笑。至地而滅。

姑射國

姑射國在海中。藐姑射之山有神人焉。肌膚若冰雪。綽約若處子。此似南華之寓言也。而山海經載之。故亦錄入。云其海有大蟹。舉一螯加於山頂。殼仍不露水面。又物性志云。姑射海中有陵魚。人面魚身。現則風濤大作。

佛國

佛國寒暑調和。無霜雪。人民殷樂。無戶籍官法。耕王地者輸地利。欲去便去。欲住便

住治不用刑。人民悉不殺。生不飲酒。唯除旃荼羅。名為惡人。與人別居。若入城市。則擊木自異。人則避之。不相擔揆。又象教碑編載。佛父臨狝國王。名肩頭佛。母名莫耶。佛未出家。所娶妻曰耶輸佉。生子曰摩睺羅。出家十二年歸。妻子復聚。今僧徒無妻。非佛本教也。

不死民國

不死民。其人黑。能飲氣。居員邱之上。以赤泉駐年。神木養命。

佛樓沙國

佛樓沙國。有青玉佛。鉢受三斗。貧人以花少許投之。即滿。富人以花百十斛投之。不盈。

支國

支國有活人草。人死以草覆面即生。

軒轅國

軒轅國在窮荒之際。其國鸞自歌。鳳自舞。食鳳卵。飲甘露。民之不壽者八百歲。不敢西射。畏軒轅之邱。或曰其人。人面蛇身。尾交於首。

因墀國

因墀國有解形之民。頭飛南海。左手飛東海。右手飛西海。至暮四體皆合。山海經載王子夜之尸。一首一身兩手兩足。皆斷異處。其人不死。郭璞謂其形斷而神連。貌乖而氣合。圖贊以為離不為疎。合不為密。又晉時因墀貢五足獸。問其使者。是何變化。曰解形之民。手遇疾風。飄於海外。化為五足獸。一指為一足也。其人失去兩手。使人割肉為兩臂。則宛然如舊。

司幽國

司幽國其人無配合。而以氣相通。思士不妻而感。思婦不夫而孕。

常夢國

常夢國在西南。其人五十日一覺。以夢境為實。以覺為虛。又有常覺國。其人常醒。不知有夢。

狂人國

狂人國有狂泉。飲之者以狂者為不狂。不狂者為狂。更相笑訕。

醉人國

醉人國能為千日之酒。飲之者一醉千日。一人數十醉。而一生之事已畢。

鬼國

鬼國在貳負之尸北。人面一目。毘舍那有鳥羽鬼形之民。當另是一國。東荒經載。東南方有人。周行天下。身長七丈。朱衣縞帶。以赤蛇繞額。尾合於頭。不飲不食。朝吞鬼三千。暮吞鬼三百。名曰尺部。此則鬼之雄矣。

駭馬西鬼國

鬼國在駭馬國西行六十日。其國人夜遊晝隱。身著鹿皮衣。眼鼻與中國人同。惟口在頂上。噉鹿及蛇。

鬼母國

鬼母國在南海小虞山中。一產千鬼。朝產之。暮食之。今蒼梧有鬼姑神是也。虎頭龍足。蟒目蛟眉。其形可畏。建康中有楊二郎販海。遇盜墜於水中。逢浮木抱之。漂至一島。登岸行入洞中。見男女雜沓。爭來聚觀。多裸形。而聲音可辨。一婦人最尊者。稱為國母。侍衛頗眾。問之曰。願住此否。楊曰。願。母與為夫婦。約二年。起居與世無異。嘗有駛卒持書至。曰。真仙邀赴瓊室。即盡室往。楊往往獨處洞中。不勝冷寂。一日乞侍母行。

母許之。凌虛而去。至一館宇。優樂盤盂極豐潔。鬼母導楊隱於幃。戒屏息。移時宴罷。聞人哭聲。審聽之。其妻子也。楊從桌下出。家人以為鬼。交唾之。唯妻泣曰。汝沒於海。故設道場修薦。何得在此。楊曰。我未死。具道所值。鬼母招喚。見楊不應。怒罵而去。少頃寂然。楊氏調補數月。其顏始復。又有福清楊氏。亦墮鬼國。其事相似。

羅刹國

羅刹國在婆利之東。其人極陋。朱髮黑身。獸牙鷹爪。時與林邑人作市。輒以夜晝日。則掩其面。隋煬帝大業三年。遣使常駿等使赤土。至其地。

羅刹鬼國

羅刹鬼國在東海大洋之中。明隆慶時。有買舶失風。飄蕩數日。入於一處。名曰暗海。天日無光。洪濤湧起。見波中有人千萬。若沒若滅。逼近舟航。眾人大恐。操舟者云。無妨。急命作飯散投水中。其人漸去。去後舟人曰。覆水之冤。精靈結聚於此。饑來索食。梵經所云。飄墜羅刹鬼國。正謂此也。

夜叉國

夜叉國在蘇都識匿國之界。有一大山。山有大窟。窟中深遠無際。人莫敢入。近窟居

人有五百餘家。作關設鎗以守。一年再祭。人有走近窟口者。烟氣衝出。觸之即死。

魁國

魁國山海經作末國。即魁也。其形黑首三角。兩目上豎。斯亦夜叉之族。

羽民國

羽民國在東南。卵生有翼。能飛而不能遠。食鸞鳥之卵。舜時獻火浣布。

毛民國

毛民國人絕短小。身面皆毛。剛如豕鬣。晉永嘉時。都尉戴逵在海上得一艘。中有男女四人。狀皆如此。後死其三。止存其一。配之以妻。漸曉人語。自言是毛民國來。又神異經云。八荒之中有毛人焉。名曰髯麗。其北為勞民國。為人躁擾不定。

卵民國

卵民國其民卵生如鳥。與羽民同。但羽民有翼。而此無翼。

勒畢國

勒畢國人長三尺。有翼常群飛。日下自曝其身。身熱乃歸。飲甘露。甘露者日初出之珠漿也。漢元封五年貢細鳥。以方尺玉籠盛數百頭。形如大蠅。狀如鸚鵡。聲聞數里。

國人常以此鳥候時。亦曰候日蟲。帝置於宮內。旬日飛盡。帝求之不復得。明年忽見細鳥自集帷幕。或入衣袖。宮嬪皆悅。有鳥集其衣者。輒蒙愛幸。武帝末。稍自死。人猶愛其皮服。其皮者。當為丈夫所媾。

勒題國

勒題國人皆毛羽無翼。而飛行日中無影。食黑河藻。飲陰山桂。其壽千歲。

無脊國

無脊民其人穴居。食土。身死埋之。其心不朽。百年後復化為人。三才圖會云。三蠻國民。死復能生。亦與無脊相類。

細民國

細民國其肝不朽。百年而化為人。穴居野處。

一目國

一目國在北海外。手足皆具。一目居面之中。深目國人亦一目。第止一手。又一國人雖兩目皆豎立。名曰縱目。

柔利國

柔利國其人一手一足屈曲向前。

無腸國

無腸國為人長大腹中空洞無物。所食之物過而不留。

聶耳國

聶耳國耳長及頰。異林云耳垂至腹以兩手攝之而行。出入能乘文虎。又有拘瘻國。皆以一手把瘻亦猶聶耳。

大耳國

大耳國耳大於身。夜卧覆一耳以為衾。展一耳以為席。

離耳國

離耳國近伯慮國。在朱崖海中。不食五穀。但啜蚌蛤。鈹離其耳分。令下垂以為文飾。是即僂耳。

彫題國

彫題國近北胸國。在鬱水南點澗。其面文以丹青。畫體為鱗。是即鮫人之族。

歧舌國

歧舌國舌皆兩歧語不可知而目相曉

三瞳國

三瞳國其民四舌而三瞳

長頭國

長頭國即毘騫國。梁時聞焉。在頓遜之外。大海洲中。去扶南八千里。傳其王身長丈二頭長三尺。自古不死。莫知其年。知將來事。其子孫生死如常。南方號曰長頭王國。俗有室居。衣服噉粳米。言語小異。扶南不受估客。有往者殺而噉之。又傳扶南東漲海。朱諸溥國有燃火洲。有樹生火中。人取其皮績作布。色微青黑。有垢汚。投之火中。旋更精潔。毘騫主亦能作天竺書。書可三千言。說其宿命所由。與佛經相似。茲論善事。

三首國

三首國一身三首。野處巢居。觀則竝見。食則竝飽。又爾雅云。崑崙山上有三頭之人。偃處琅玕樹下。遞臥遞起。以食為實。

三身國